

四庫全書

子部

欽定四庫全書

六藝之一錄卷六十五

錢塘倪濤撰

石刻文字四十一

唐碑

祠廟

立陳平廟碑

正書無書撰人姓名武德四年

金石錄

魯府君廟碑

在宣城縣南六十里有斷碑載武德六年魯之崇以

宣城降

輿地
碑目

諸葛武侯行廟碑

在興元府貞觀十一年

輿地
碑目

少姨廟碑

楊炯撰沮渠智烈書永淳元年十二月

金石
錄

右少姨廟碑楊炯撰云少姨廟者則漢書地理志嵩

高少室之廟也其神為婦人像者則故老相傳云啟

母塗山氏之妹也余按淮南子云塗山氏化為石而

生啓其事不經固已難信今又以少姨為塗山氏之
妹廟而祀之其為淺陋尤甚蓋俚俗所立淫祀也炯
既載之于碑又遂以為漢書所謂少室之廟者何其

陋哉

金石錄

啓母廟碑

崔融撰沮渠智烈書永淳二年正月

金石錄

右唐啓母廟碑崔融撰按淮南子云禹治洪水通轆
轤山化為熊塗山氏見之慚而去至嵩高山下化為

石方生啓禹曰歸我子石破北方而啓生其說可謂怪矣然漢武帝幸維氏至中嶽見夏后啓母石列于詔書則固已信之矣其後郭璞注山海經顏師古注漢書皆具載其語而融又文其事于碑流俗安得不惑乎自古荒誕之士喜為奇詞怪說以欺世眩俗學士大夫能卓然不惑者蓋鮮如啓母化為石伊尹之母化為桑事尤不經難信然由古訖今未有非之者也嗚呼此君子所以惡攻乎異端也歟

金石錄

八都壇神君實錄碑

正書無書撰人姓名垂拱元年十月

金石錄

右八都壇實錄撰人名元質不見其姓又不著書人名氏其字畫亦可愛碑首題云大唐八都壇神君之實錄其文云都望八山之始壇也此地名山封龍之類有八因壇立廟遂為號焉封龍山在今鎮州其餘七山不見其名又云漢光和中有一碑而今亡此碑垂

拱三年立

六一題跋

唐八都壇記碑首題曰八都壇神君實錄八都者蓋其以封龍等八山為壇都望而祭之因壇立廟以為名唐刺史馮義縣令蕭侯等禱雨有應率人修其廟而為之記因列時人姓名於後撰述者自稱元質而不著姓亦無書人名氏碑以垂拱三年立

集古錄目

昇仙太子碑

武后撰并行書聖歷二年六月碑陰薛稷書附右周昇仙太子碑武后撰并行書昇仙太子者王子晉

也是時張易之昌宗兄弟方寵諂諛者以昌宗為子
晉後身故武后為葺其祠親銘而書于其碑君臣宣
淫無恥類如此可發萬古之一笑也

金石錄

武曩淫橫千古而亦假借柔翰天之生才於彼何其
不靳也此文未必真出后手當是北門學士語碑首
昇仙太子之碑六大字飛白書作鳥形亦佳飛白書
久不傳于世此其僅存者耳

石墨
鐫華

唐武后行書聖歷二年六月今在偃師縣南三十五

里府店維山寺本廟

金石文
字記

周許由廟碑

則天撰相王旦正書大足元年五月

金石錄

紀信廟碑

盧藏用撰并八分書長安二年七月

金石錄

盧慈明八分書

金石略

堯廟碑

盧永慶撰劉濟初正書武后時立

金石錄

光武皇帝碑

正書無書撰人姓名武后時立

金石錄

北嶽府君碑

韋虛心撰陳懷志行書開元九年三月

金石錄

陳懷志此碑在李北海雲麾之下法華之上蓋以其筋骨有餘而丰度微溢爾淵泉富有唐世遺刻試校之當自知也甲寅三月二十七日題是日立夏風雨蕭瑟如高秋讀是文恍若從恒山麓下遇水電交作

山谷晦冥時從羽人仙客問投宿處景象也

圭牘記

河侯新祠頌碑

秦崇撰王晏行書開元九年四月

金石錄

右唐河侯新祠頌秦崇撰云河伯姓馮名夷字公子
潼鄉華陰人也按章懷太子張衡傳注引聖賢冢墓
記亦云馮夷者弘農華陰潼鄉隄首里人服八石得
水仙為河伯又引龍魚河圖曰河伯姓呂名公子夫
人姓馮名夷三說雖異然其為無所據稽則同也嗚

呼自古荒誕之說惑人雖聰明之士猶或不免況庸人乎

吳季子廟碑

八分書書撰人姓名殘缺開元十年

金石錄

北嶽碑

張嘉貞撰并行書開元十五年八月

金石錄

恒山祠碑張嘉貞撰并書今在曲陽縣北嶽廟中按舊唐書嘉貞為定州刺史至州於恒嶽廟中立頌自

為文書於石其碑用白石為之素質黑文甚為奇麗
先自嶽祠為遠近祈賽有錢數百萬嘉貞自以為頌
文之功納其數萬今白石碑尚在本傳又言嘉貞官
至宰相不為子孫立業豈好貨者乎或矜誇其文則
有之然唐人以文取錢未嘗以官取錢嘉貞於此又
僅百而取一古之疾也今也或是之亡矣

金石文
字記

唐老子廟碑

予儒卿撰房自謙正書開元十八年三月

金石
錄

唐東方朔廟碑

柳令譽撰行書無姓名開元十九年三月

金石錄

唐立漢光武皇帝廟碑

李雲撰盧規行書開元十九年十月

金石錄

北嶽真君碑

房鳳文八分書開元二十年正月

金石錄

青城山丈人祠廟碑

徐大亨撰甘遺榮八分書開元二十年三月

金石錄

南嶽真君碑

趙頤真撰蕭誠正書開元二十年十月

金石錄

御史蕭誠書太原題名唐人無出其右為司馬係南

嶽真君觀碑極有鍾王法

海嶽名言

右唐南嶽真君碑有別駕賞紫金魚袋光大旺歐陽

公云賞紫蓋今借紫之比余按唐制自有借紫借緋

而又有賞紫賞緋蓋以軍功被賞者耳

金石錄

玄元皇帝廟額碑

敬抱忠撰呂獻臣八分書開元二十年十月

金石錄

唐華嶽真君碑

唐華陰丞陶翰撰韋騰書玄宗開元十九年加五嶽

神號曰真君初建祠宇立此碑

集古錄目

北嶽恒山碑

釋邈詞釋曠書開元二十一年八月

金石錄

后土神祠碑

明皇撰并八分書開元二十一年八月

金石錄

唐明皇分書太子鴻以下題名在河中府

金石畧

唐老子廟碑

崔季友撰鄭鉉正書開元二十二年四月

金石錄

老子聖母碑

李升卿撰呂承獻八分書開元二十二年九月

金石錄

尉遲迥廟碑

顏真卿撰蔡有鄰八分書開元二十六年正月

金石錄

唐前華州鄭縣尉閻伯璵撰序秘書省校書郎顏真

卿撰銘蔡有鄰隸書迥字居羅代人仕周為相州總管
周末隋文帝秉政迥舉兵不克而死唐武德中改葬
復其封爵開元二十六年相州刺史張嘉祐為之立

廟建碑

集古
錄目

尉遲迥碑成伯璵撰世以蔡有鄰書特貴其叙迥事
與周史畧同然迥之死節不得顯方周之興迥已為
蜀國公矣逮魏之亡一宗伯且受命舊國舊都望
之無慨于懷不翅傳舍一日去之矣隋公總政天下

之勢可以知也。迥則不受而承制起師以興復為任其事則有疑也。豈以地居嫌疑執窮畏迫自度不能容於隋而發哉？則冤憤鬱結不得其死，宜其出靈響以自見，不得如伯璵口口也。唐說自迥之死而相州都督死者前後相繼，張嘉祐既視事，夜整冠危坐，有自西廡出者曰：余後周尉遲迥也，死於此，遺骸尚存，願得畢葬。前牧守者膽氣薄劣，驚悸而逝，非所害也。又指其女子曰：同瘞於此。明日嘉祐發掘得之，備衣衾。

棺器禮而葬焉既夕出謝曰余無他能願畢公之政
節宣水旱唯所命嘉祐以事聞上請置廟歲時血食
有詔褒異今考周紀韋孝寬既平鄴城則移相州守
安陽至于碑則謂武德中朝制改葬逮開元丁丑張
嘉祐問俗郡言多崇公曰蜀國公獨為純臣闕修殷
薦其取戾也宜哉觀此自是武德改葬至嘉祐則廟
而祀之矣亦不因詔而行也與尚書故實政戾謂神
之休福則得之其謂遺骸西廡詔為廟容改葬於

開元歲則皆誤也

廣川書跋

穎考叔祠碑

劉彙撰李琚八分書開元二十九年八月

金石錄

唐立穎考叔廟碑王利用撰序劉彙銘李琚八分書

開元二十九年歲次辛巳建

復齋碑錄

魏文侯廟碑

楊仲昌撰田琦八分書開元中立

金石錄

唐華岳精享昭應碑

唐劉昇華岳昭應碑右碑序頌華應主簿咸廩為故
相許國蘓文憲公頌祈雨獲澍而作者也侍御史劉
昇書按趙明誠金石錄於唐碑搜訪殆徧而獨遺此
昇書亦僅一見於此碑而已書法八分頗道美可仲

季惟則升卿而乏漢意聊為錄之

弇州山人蒙

唐華岳精享碑此唐開元帝遣蘓頌禱雨華山有應
而建碑也作者為主簿咸廩書者為御史劉昇昇見
金石略僅二碑而遺此今觀其隸古道逸有漢人遺

意五代以降求此一批法不可得矣

石墨
鵝華

唐華岳昭應碑開元八年華陰主簿咸廩撰殿中侍

御史劉昇八分書華州刺史李光休題額

金石文
字記

劉昇徐州彭城人景雲中授右武衛騎曹參軍開

元中累遷中書舍人太子右庶子昇能文善草隸

唐
書

北嶽廟碑

鄭子春撰隹鏤八分書李迺篆額

金石文
字記

碑鄭子春撰崔鑲書鑲無書名此碑分隸道逸直當
韓蔡雁行而無樹碑年月攷其時張守珪鎮幽州當
在開元之末耳諸家無錄者何也

石墨
鐫華

廣成子廟碑

崆峒山在梁縣西南四十里有廣成子廟即黃帝問
道于廣成子之所唐開元二年汝州刺史充本州防

禦使盧貞立碑

寰宇
記

唐立關龍逢廟碑

在靈寶縣西南七里唐太宗東巡致祭開元十三年

立碑舍人吳輩之詞

寰宇記

唐時立在河南府靈寶縣龜頭原

古今碑刻記

立漢樊君祠堂碑

王利器撰史惟則八分書徐浩篆額天寶二年十月

金石錄

右舞陽侯祠堂碑唐王利器撰史惟則八分書徐浩

篆額天寶三年縣令張紱陽修樊噲廟文及書篆皆

可愛也

集古錄

唐校書郎王利器撰集賢院待制史惟則八分書前京兆府司錄徐浩篆額舞陽令張紫陽等修廟記也碑

以天寶二年十月立在舞陽縣

集古錄目

宓子賤廟碑

李少康撰李景參正書天寶三年七月

金石錄

安天王碑陰

八分書天寶七年五月

金石錄

金天王廟靈異述

衛包撰并正書天寶九年四月

金石錄

宓子賤碑

賈至文耿篆書天寶十年四月

金石錄

蜀先主廟碑

在晉原縣房琯文

輿地碑目

張君神碑

王岳靈撰序宋昱銘李史奕正書天寶十年十月

金石錄

王岳靈天寶十載為監察御史撰張惡子廟碑

唐詩紀事

比干廟墓碑

天寶十載李翰撰正書今在汲縣比干廟唐太宗追贈比干為太師貞觀中既立碑刻詔及祭文天寶中李翰官於衛作此碑述封表之指今碑乃宋建中靖

國元年汲令朱子才重立

金石大字記

立巫馬期廟碑

賈賁撰韓軫八分書天寶十三年十月

金石錄目

呂公祠廟碑

衛密撰顧誠奢八分書上元二年

金石錄

右呂裡祠廟碑衛密撰云上元紀歲之明年詔始置南都以荊州為江陵府命長史曰尹按元結所撰呂公表與肅宗實錄皆云上元元年九月改荊州為南都獨此碑以為二年改恐誤

金石錄

立晉太尉郗公祠廟碑

十一代孫昂撰郭昇行書大厯四年十二月

金石錄

徐偃王廟碑

徐安貞撰張宙正書大厯八年十月

金石錄

徐偃王廟碑陰記

張宙撰并八分書大厯八年十二月

金石錄

司命真君碑

楊瓊撰并行書徐浩八分書題額大厯八年十二月

金石錄

天柱山司命真君碑徐浩分書在舒州

金石錄

重修延陵季子廟碑

蕭定撰張從申正書大厯十四年十月

金石錄

丹陽城西南六十里有延陵鎮去鎮九里為吳季子廟有孔子十字篆碑及潤州刺史蕭定修廟記大理司直吳郡張從申書并識重刊篆碑歲月二碑蓋同時立也歐陽公不喜從申書僅錄其三碑今存者獨此耳昔人評張書顏頤李北海今觀遺刻挺勁有餘而乏雋逸之氣恐未堪肩隨也

金石文
字記

重模延陵季子墓刻

右唐吳季子墓刻自唐以來相傳為孔子書大厯中
蕭定再模而刻之余覽史記家語及秦漢以前諸子
凡孔子與學者談議問答是非褒貶纖悉必載其間
荒誕之說實非出于聖人而附託書之者固有之矣
況于季子之賢孔子親銘其墓不應畧不見稱于前
世至唐而始傳也又碑銘始于東漢孔子時所未有
而其字畫乃故為奇偉以欺眩世俗者非孔子書無

疑蓋好事者偽為彌故余特為錄之以解來者之惑

後有博識之士當以余言為然

金石錄

河瀆祠碑

王延昌撰趙復行書大厯三年九月

金石錄

禹廟碑

崔巨撰段季展行書大厯三年十一月

金石錄

崔巨文傳于今者絕少皆不及此碑季展他所書亦

不侔於此治平二年上元日書

集古錄

嚴將軍廟碑

在巴州貞元元年韋曾撰

輿地碑目

漢嚴顏碑唐韋增記在保寧府巴縣治

古今碑刻記

會稽山神永興公祠堂碣

韓梓材書越州

金石畧

貞元元年立

輿地碑目

郭汾陽廟碑

高參撰張誼行書貞元二年九月

金石錄

貞元二年郭子儀廟碑高參文其叙子儀功業不甚

詳而載破墨姓虔木討沙陀虔密事則唐書列傳無之蓋子儀微時所歷其後遂立大勲宜乎史略不書也然唐志有虔密虔月朱邪孤注等皆是西突厥薛延陀別部名號余於五代史為李克用求沙陀種類卒不見其本末而參謂虔密為沙陀不知其何所據也按陳翊子儀家傳亦云討沙陀虔墨十二姓與參所書頗同唐書轉密為密當以碑為正

六一
題跋

姜嫄公劉廟碑

高郢撰張誼行書貞元九年四月

金石錄

大中大夫行中書舍人上輕車都尉賜紫金魚袋高
郢撰節度巡官將仕郎試大理評事張誼書節度判
官殿中侍御史韋丹建立處士張瑄篆額右唐姜嫄
公劉新廟碑中書舍人高郢撰試大理評事張誼行
書廟在今邠州城南唐邠寧節度觀察使張獻甫所
遷故當時稱曰新廟而高郢為文予昔以尚書郎出
使寧夏道邠謁廟其後稍上有履迹平

爾雅大野曰平俗作坪非

乃姜嫄履巨人迹所在予為大書履迹平三字俾州
官刻置廟側盖州人但知有廟而少知乎此故表而

出之

金蕪
琳瑯

先主廟碑

貞元四年蕪瑞撰在昭烈帝廟中

輿地
碑目

鹽池靈應公神祠碑

崔敖撰韋縱正書貞元十三年八月

金百
錄

白楊新廟碑

令狐楚撰鄭造正書貞元十六年七月

金石錄

張中丞許特進南特進廟碑

韋藏孫撰趙晏正書元和十五年

金石錄

南海神廟碑

韓愈撰陳諫正書元和十五年

金石錄

南海神廟碑韓愈撰以余家舊藏本校之皆同惟集本云蛻蛻蛻蛻而碑為蛻蛻蛇蛇小異當以碑為正今世所行昌黎集多舛惟南海碑不舛者以此刻石

人家多有故也其妄意改易者頗多亦賴刻石為正

也六一題跋

陳諫河中少尹貶台州司馬終循州刺史見唐書

王伾傳

梁山廟碑

在常德府元和四年董挺撰

輿地碑目

蜀丞相諸葛武侯祠堂碑

右記裴晉公度撰柳尚書公綽書是時在武相元衡

幕中三公勲業年位雖小異要之不愧忠武侯者柳
於書不得稱名獨米元章謂其勝誠懸今觀其行筆
飄灑雄逸無拘迫寒儉之態真足墮筌第結構小疎
不能運鐵腕捺磔間耳碑在成都七百年矣完好尚
如新得非以僻故存耶

弇州山人藁

右裴度文乃成化中重鐫者有御史榮華跋言予寬
此書如端人正士筆法道勁裴公文稱秉事君之節
者無開國之才得立身之道者無治人之術四者備

矣惟武侯有之信如跋言也玉泉公自蜀還見貽因

記其後嘉靖丁巳六月八日雨記也

蒼潤軒跋碑

裴度撰柳公綽正書元和四年二月今在成都府丈
稱元和二年相國臨淮公鎮蜀者武元衡也裴公時

為節度掌書記

金石文字記

白將軍廟碑

在巢縣元和七年立

輿地碑目

狄梁公祠堂碑

唐馮宿撰胡証正書并篆額元和中立

復齋碑錄

在魏縣東南四里梁公為魏州刺史百姓立祠祀焉

寰宇

記

狄梁公祠二碑一李邕文張虔繼書開元中立一馮

宿文胡証書元和中立在順德府城南

古今碑刻

羅池廟碑

韓愈撰沈傳師正書長慶元年正月

金石錄

羅池廟碑長慶中唐尚書吏部侍郎韓愈撰中書舍

人史館修撰沈傳師書碑後題云長慶元年正月建
按穆宗實錄長慶二年二月傳師自尚書兵部郎中
翰林學士罷為中書舍人史館修撰其九月愈自兵
部侍郎遷吏部碑言柳侯死後三年廟成明年愈為
柳人書羅池事子厚以元和十四年卒至愈作碑時
當是長慶三年考二君官與此碑亦同但不應在元
年正月蓋後今傳摸者誤刻之爾今世傳昌黎先生
集載此碑文多同惟集本以步有新船為涉荔子丹

兮蕉黃蕉下加子當以碑為是而碑云春與猿吟而

秋鶴與飛則疑碑之誤也

六一
題跋

文公叙羅池事亦既異矣夫鬼神茫昧幽渺不可致詰聖人悶而不言惟知道者深觀其隱自理得之然不以示人恐學者惑也昔殷人尚祭祀事死以生其敝小人以鬼則立教御俗可不慎耶嘗觀文公守儒道甚嚴以世教為己任其論武陵謝自然事勇決果斷不惑于世可謂能守道者至羅池神則究極細瑣

惟恐不盡豈亦蔽于好奇而不能自己耶 又為李
文叔書羅池碑云羅池之文至矣來者不能加也其
以子厚正直為神誤矣昔歐陽文忠學文公而知至
者嘗評田弘正碑銜訓嗣事為謠必曰事嗣則語叅
錯而雜比故能起而振也余讀此碑至牛繫輒下引
颿上檣益知簡鍊差擇其精至此信天下之奇作然
永叔謂春與猿吟兮秋鶴與飛疑碑之誤此最退之
用工處不知何故反於此疑之考銜訓事嗣退之便

是一體得於彼而失於此蓋亦不思也

廣川書跋

黃陵廟碑

韓愈撰沈傳師正書長慶元年

金石錄

長慶元年黃陵廟碑韓愈撰沈傳師書昌黎集今大
行於世而惠本不真余家所藏最號善本世多取以
為正然時時得石刻校之猶不勝其舛謬是知刻石
之文可貴也不獨為玩好而已黃陵碑以家本校之不
同者二十餘字如家本言降小君為夫人而碑云降

小水之類皆當以碑為正也

六一題跋

黃陵碑世以其書為重石久缺剥字減幾半矣近人以其完本售至數萬謂傳師此書特謹重有法不與他石並也歐陽永叔嘗得其碑謂降小君為夫人据碑為定其餘猶有可證於書者今考於禮如夫人之為小君自不失正豈書猶可疑也又若陟方等語大不合於書矣退之於文嚴整密緻故語妙天下余於黃陵碑疑之詞不整比而辨事謬誤不知何為至是

其謂張愉曰且使後世知有子名加此于人其誰受
之耶穆宗詔曰張愉學古人仕甚修飾河西有政聲
次於李諒則愉之名不待愈而後世知之矣

廣川書跋

右唐黃陵廟碑碑四面皆有字今其兩面字多處已
磨滅不可讀此本蓋七八十年前舊物字書完好可
寶也今世所傳退之集多為人妄加讎校而此碑人
家尚時有之故訛謬為少然退之自潮移袁入為國
子祭酒蓋三年而碑云三十年蓋書碑者誤耳

金石錄

博士王持國得韓愈撰黃陵廟碑甚完其字無譌軸而藏之屬余書其後余謂黃陵文見昌黎集人皆可得惟碑以傳師書為貴久則字剝缺不可讀故其完本難得余嘗考昌黎之文閱深浩博不與世人同機軸卓然自成一家獨于此碑雜碎無統紀文氣亦不純而格韻不類蓋其辨湘君已失故其言亦自畔不得經意湘君即舜妃夫人為女英以楚詞可得知之古者天子建后其以娣姒從者雖皆同姓自當為夫

人此禮也郭璞疑帝舜之后不當降小君夫人愈謂
有小君故正得稱君夫所謂君即小君也后夫人配
君故天子國人稱之謂君則后謂小君降天子也舜
不立正妃二女以長幼為序不言后豈后之下復為
小君以稱此非禮也惟諸侯之妃天子封之曰夫人
故國亦以小君稱之對諸侯以自稱於國也書稱舜
曰五十陟方乃死禮曰天子登遐釋詁曰隲假格陟
躋登升也則登遐升遐同文舜為陟方自是南巡狩

凡行必謂陟蓋往而升也不謂地有高下而降陟異
詞周公稱成湯曰禮陟配天自是殷禮能升配天享
國不宜遂以為陟而死也今日陟文句為盡而謂方
乃死者此不成語愈書誤以竹書雖以陟為升謂升
遐也不得於此取之觀愈於此碑時用工深故博考
而詳取蓋求之太過牽強取合固宜忘失本意

廣川書跋

徐偃王廟碑

徐偃王碑昌黎韓愈撰徐放書碑故在集中以其文

相校不失蓋碑近而傳者衆故得不誤愈於此碑序
事淹諛華實不似黃陵等碑錯雜無序駸駸上薄漢
周不造其極則不止魏晉宋齊糠粃殆盡略無餘習
可謂至矣昔人嘗謂公於文渾然一出於已不蹈襲
前人橫驚直肆恢奇衍溢今考其言曰徐不忍闕其
民北走彭城武原山下百姓隨而從之萬有餘家因
號其山為徐山此即范曄漢書全用其語偃西王母
事盡錄穆天子傳朱弓赤矢采祥瑞志然則愈於文

蓋亦未嘗不用前人語但使人不覺如已出也其曰
故制樸角昔人嘗改為楠淮南子曰堯樸角不斷素
題不斲愈于書無所不用也

廣川書跋

衢州徐偃王碑昌黎韓愈撰福州刺史元錫書元和

十年十二月九日立

韓文
考異

元錫字君貺河南人淄王傳見唐宰相世系表

新修虞舜廟碑

嶺南東道節度推官謝楚撰長慶元年立

輿地
碑目

禹穴碑

鄭魴撰序元稹銘韓梓材行書寶曆二年九月

金石錄

馬先生廟碑

太和九年十一月盧中規撰崔植正書

金石錄

崔植字公修博通經史長慶初拜中書侍郎同中

書門下平章事

陽山祠神二碑

劉禹錫撰并書鼎州

金石錄

靈應廟碑

會昌元年建在錢清鎮祠下

輿地
碑目

會昌元年前進士呂確書

會稽
志

南瀆廣源公碑

李景讓撰蓋巨源八分書大中十二年正月

金石
錄

蜀相武鄉忠武侯諸葛公碑

唐李景讓撰正書無名氏篆額大中十年三月建

復
齋

碑
錄

大中三年李景遜撰今在隆中

輿地
碑目

周公祠靈泉碑

周公祠靈泉湧出大五小七凡十二處觀察崔珙奏
狀勒石事在大中間石前刻奏狀中刻宣宗批荅后
刻珙謝表文詞宛至有盛世風書亦道健有法且其
叙列大似漢人碑例而遜其古質耳如此等碑宋以
後不可得也

石墨
鵠華

鳳翔府岐山縣鳳棲鄉周公祠舊有泉水久竭大中

間泉忽湧出崔觀察珙奏狀亦水旱恒事耳宣宗手
詔褒嘉猶見下霽而史尚以無復仁恩察察為明短
之何也碑勒奏及手詔謝表筆氣蕭散有褚河南意
後書年月及銜復似柳如出兩手

金石
史

崔珙奏答詔俱正書大中二年十一月今在岐山縣

周公廟

金石文
字記

天王廟碑

在贛州咸通二年刺史李振撰

輿地
碑目

伏波廟碑

咸通八 years 左武衛兵曹參軍崔遂文

輿地
碑目

唐新立鎮南將軍劉表廟碑

唐陵州刺史劉權撰并書劉表字景升山陽高平人
後漢末為荊州牧僖宗時山東南道節度使劉巨容
嘗夢見之故為立廟巨容自稱裔孫碑以廣明二年

立

集古
錄目

唐劉表碑陰

碑陰劉巨容題記與廟碑同巨容既立廟因於墓側

構水亭為遊宴之所後記表僚屬蒯越韓嵩等及蜀

先主在荊州事迹未有表所作山道口亭銘刻在廟

碑之陰

集古
錄目

孚旣侯廟碑

在銅陵縣中和二年立

容齋
四筆

蜀先主廟碑

郭欽撰正書乾寧元年今在涿州樓桑村廟中剝蝕

其首行曰婁居道重修

金石文字記

張將軍魯新廟碑

張將軍新廟記李巨川撰唐彥謙書張魯事史傳詳

矣巨川文詞匪工所錄者彥謙書爾彥謙書頗知名

於世故畧存其筆蹟也

六一題跋

修北嶽廟殘碑

劉端撰王知新行書今在曲陽縣廟中記王履直修

廟事

金石文字記



六藝之一錄卷六十五

欽定四庫全書

子部

六藝之一錄卷六十六
七

詳校官中書臣陸湘

貢外郎臣牛稔文覆勘

總校官檢討臣何思鈞

校對官中書臣陸湘

勝錄監生臣王宮

欽定四庫全書

六藝之一錄卷六十六

錢塘倪濤撰

石刻文字四十二

唐碑

祠廟

伏羲廟碑

唐孫郛撰趙穀書并題額光化中立

訪碑錄

堯帝祠碑

唐朱誕撰在青州府城西北

古今碑刻記

箕子祠碑

唐柳宗元撰在河南衛輝府淇縣南

古今碑
刻記

古義士伯夷叔齊碑

梁升卿八分書河中府

金石
畧

安定梁升卿纂文并書

金石
琳瑯

今在蒲州首陽山二賢廟中其文書于碑之南面其

側有後唐同光元年護國軍節度押衙丁約建立廟

宇題字

金石文
字記

鄭子產廟碑

唐天寶中立今磨滅存僑東里人數字在河南開封

府新鄭縣陘山

古今碑
刻記

岱嶽天齊王靈應碑

萬賓書兗州

金石
畧

唐夏禹廟碑

顏庚書在陽翟

碑帖
考

唐修中嶽廟碑

李芳郁書

墨池編

唐要柵湫神祠碑

房晉書

墨池編

房晉武后時人光宅元年房晉詞標文苑科策見

文苑英華

唐淮瀆廟碑

釋曠書

碑帖攷

唐沐澗魏夫人碑

僧從謙書

墨池編

晉紫虛元君祠宋時碑尚存在懷慶府城紫金壇

唐封廣順王廟碑

李承祐書

墨池編

唐葉君廟碑

趙魯書

墨池編

唐汾州創置城隍廟碑

李巨業書

墨池編

西楚霸王廟碑

賀蘭咸書
衡州金石畧

西楚霸王祠堂頌
賀蘭進明撰
賀蔭誠書
天寶十三

年十月
金石錄

唐重立徐偃王廟

姚宗八分書
墨池編

唐立傳說廟碑

唐侍御史內供奉楊麟撰
宗正丞

姓名缺

八分書
大厯

四年立在夏縣

集古錄目

漢董子祠碑

唐宋碑刻猶存在北直隸河間府景州廣川鎮

古今碑刻

記

祖將軍廟碑

顏魯公撰在江西九江府江州湖心

古今碑刻記

烏雷廟碑

自唐以來碑記皆存在廣東廉州府欽州南

古今碑刻記

孝烈將軍廟碑

在河南歸德府治即木蘭女也

古今碑刻記

濟瀆廟碑

貞元十三年張洸撰八分書 唐制附祭北海於濟

源此碑記新作祭器事碑文乃濟源令張洸字濯纓

所撰簡古有體裁一洗駢儻之習洸與韓退之同時

文體已矯傑如是蓋文弊之極而將變元結權德輿

輩皆然不獨韓也

金石文字記

修武安君白公廟碑

廟在今咸陽東古杜郵起慘刻獨有將略耳亦祀至
今何也壁間記唐乾符五年重修事正書道勁亦有
歐法知唐世官牒無不作佳書也記中所刻添置物
色有眇子舍一十間沙子三間華一顏石押衙影等

皆不可曉

石墨
鐫華

正書乾符五年十二月立今在咸陽縣

金石文
字記

濟安侯廟碑

唐李巨川撰柳懷素正書光化二年四月一日記

便齋

碑錄

記在華州唐昭宗在富平韓建迎之至華自華歸長
安褒建而及于城隍神記為諫議大夫李巨川撰拾
遺柳懷素書文固諛詞而楷則嚴整何如君家誠懸

具眼者自知之

石墨
鐫華

碑在華州城隍廟內近日移之西安唐昭宗自華州
還京改華州為興德府封少華山神為佑順侯華州

城隍神為濟安侯此丈多述韓建之功稱太傅許國公而不名朱彞尊曰巨川為韓建掌書記撰許國公勤王錄以媚建方昭宗幸華建請散殿後軍誅李筠圍諸王十六宅皆巨川教之後為朱全忠所殺新唐書附諸叛臣之列

金石文
字記

天下金石志作
華州城隍廟碑

重修忠懿王廟碑

天復元年錢昱撰在福州

輿地
碑目

唐鄭司農碑

二

開元十三年史承節撰雙思貞行書

金石錄

崔潛撰分書無年月在高苑縣

諸道石
刻錄

唐立漢文範先生陳君碑

在鄆陵廟內裴延休文

訪碑
錄

唐陳太邱祖德碑

系孫蕪撰序休撰銘任子膺書天寶九年十一月

金石

錄

蜀守李公碑

韋行儉撰王綸行書貞元十四年七月

金石錄碑
帖攷作唐秦

蜀守李公
誓水碑

立梁宣帝明帝二陵碑

韓休撰行書姓名殘闕開元二十一年

金石錄

重建顏含碑

晉李闡撰曾孫延之銘十四代孫真卿正書大厯七

年四月

金石錄

晉江夏李闡撰傳舍曾孫宋光祿大夫顏延之撰銘

十四世孫唐前撫州刺史真卿書含字弘都瑯琊臨沂人東晉初官至右光祿大夫西平侯謚曰靖此銘舊有刻石大歷七年四月重建

集古錄目

唐立晉顏含太宗碑

含十四世孫唐撫州刺史顏真卿撰并書真卿罷撫州過含祠墓因叙含而下十五世子孫名字事迹立此

碑以大歷六年十一月立

集古錄目

唐立衛伯玉遺愛碑

伯玉裔孫唐陝觀察使次公撰河中節度使張弘
靖書伯玉河東安邑人晉惠帝初以太保錄尚書事
為楚王瑋所殺碑以元和六年立在安邑

集古錄目

漢李固碑

唐韋準撰在陝西漢中府城固縣西

古今碑刻記

重立周孝侯碑

宜興周孝侯碑尾云唐元和六年十一月十五日守
義興縣令陳從諫重樹此碑前試太常寺協律郎黃

闕書
兪州山人藁

魏州刺史狄仁傑生祠碑

李邕撰張庭珪八分書開元十年十二月

金石錄

中書令張九齡廟碑

長慶三年張九齡碑按唐書列傳所載大節多同而
時時小異傳云壽六十八而碑云六十三傳自左補
闕改司勳貲外郎而碑云遷禮部傳云張說卒召為
秘書少監集賢院學士知院事碑云副知至後作相

遷中書令始云知院事其載張守珪請誅安祿山事
傳云九齡判守珪狀碑云守珪所請留中不行而公
以狀諫然其為語則略同碑長慶中立而公薨在開
元二十八年至長慶三年實八十四年所傳或有同
異而至於年壽官爵其子孫應不謬當以碑為是也

六一
題跋

右唐張九齡碑徐浩撰并書歐陽公集古錄云按唐
書列傳所載大節多同而時時小異碑長慶中立而

公薨在開元二十八年至長慶三年實八十四年所傳或有同異至于年壽官爵子孫宜不謬當以碑為是今考之浩撰碑時為嶺南節度使在大厯間距曲江之卒未遠至長慶中其家始刻石爾劉禹錫讀曲江集詩序以謂曲江燕翼無似終為餒鬼而碑載公嗣子及孫藏器碑後又載曾孫敦慶玄孫景新景重然則曲江為有後矣不知禹錫何所據乎碑又云公一名博物而史不載

金石錄

徐浩撰并正書大厯中書撰長慶中刻石

同上

刺史杜敏生祠碑

張粲撰史惟則八分書乾元三年五月

金石錄

贈戶部尚書楊瑒廟碑

王曾分書京兆府

金石錄

晉公李林甫撰王曾書王敬從題額

遊城南記

王敬從京兆人對策甲科授岐州陳倉主簿遷秘

書省校書郎三入華省再登禁闥與兄易從弟擇

從咸以文學齊名見孫逖集

忠烈段太尉廟碑

盧慈明書鄭州

金石畧

顏真卿廟碑

一在蓬州一在榮山縣俱四川

古今碑刻記

唐碑 家廟

唐永興公虞世南先廟碑

貞觀中立

京兆金石錄

唐贈司徒馬璘新廟碑

程浩撰顏真卿正書大曆十四年七月

金石錄

唐禮部郎中程浩撰吏部尚書顏真卿書太子中允翰林待詔韓秀實八分書題額馬璘字仁傑扶風安定人官至四鎮北庭涇原節度使贈司徒開元二

十四年十二月刻

復齋碑錄

贈太保郭敬之廟碑

唐刑部尚書顏真卿撰并書代宗御題額敬之華陰

鄭縣人官至壽州刺史肅宗乾元初以子子儀故追

贈太保此其廟碑也以廣德二年五月立

集古
錄目

顏真卿撰并正書廣德二年十一月碑在京兆府

金石

錄

碑在今陝西布政使署御題額顏魯公撰并書敬之
汾陽忠武王父也夫以汾陽家廟得魯公手書千載
而下猶有生氣其文與書又非所論也但其碑在後人
雜還之所雖巋然壁上而不無磨蝕之憂然以二

公之靈鬼神呵護有由來矣

石墨
鐫華

郭敬之碑陰子孫題名

唐王縉撰徐浩分書永泰元年

京兆金
石錄

碑陰具述汾陽兄弟子孫始知汾陽兄弟九人皆列
大位不止史所稱幼明一人而已且汾陽封拜與史
小異錄具左方碑正書陰作行書不啻亦出魯公否
觀其筆力似非魯公不能也史稱子儀初授左衛長
史累遷單于副都護振遠軍使又以天德軍使兼

九原太守又為衛尉卿靈武郡太守又加實戶七百
頗與碑不合碑立于廣德二年十一月子儀是時年
六十八歲官止于尚書令魚中書令故不及攝冢宰
尊尚文等事但史言子儀辭尚書令碑乃實書之且
通鑑拜尚書令在十二月此前一月書當是史誤

石

鐫
華

顏氏家廟碑

顏氏家廟碑顏真卿撰并書真卿父名惟貞仕至薛

王友真卿其第七子也述其祖禰羣從官爵甚詳

集古

錄

顏真卿撰并正書李陽冰篆額建中元年七月

金石錄

此唐顏氏家廟碑為魯公真卿撰并書按跋尾此碑
遭兵亂仆于野宋太平興國七年都院孔目李廷襲
始移至府城孔廟中而碑幸完予知碑名久矣恨不
可得同年周公瑞都憲巡撫陝西始寄至猶恨缺其
額耳蓋以碑額為無用多不捐或碑穹工人艱于捐

而置之不知碑無額如物無首為完物乎況此額為

李陽冰篆書可謂二絕何可缺邪

鮑翁家藏集

唐故通議大夫行薛王友柱國贈秘書少監國子祭

酒太子少保顏君廟碑銘并序第七子光祿大夫行

吏部尚書充禮儀使上柱國魯郡開國公真卿撰并

書集賢學士李陽冰篆額末云建中元年歲次庚申

秋七月癸亥朔鐫畢八月己未真卿蒙恩遷太子少

師冬十月壬子男頤封沂水縣男頊封新泰縣男姪

男頂缺縣男頌費縣男頌鄒縣男微軀官階勲爵並
至二品子姪八人受封無功無能叨竊至此子孫敬

之哉

金薤
琳瑯

陸士龍有言文以述祖德為美故三代彝器皆孝子
慈孫為其祖父而立者魯公此碑蓋近之矣又此碑
後有太平興國七年八月二十九日重立李廷襲記
十七字篆書乃夢英手筆蓋此碑倒於郊野廷襲告
於上官移載入於府城立於丈廟故自託之也夫以

顏氏之物子孫不能守而後之人為之移徙則為人子孫思以稱述先德而異世之後欲圖不朽者可以

思矣

蒼潤軒
碑跋

右顏魯公家廟碑石刻四面環轉在關中後廟燬宋初有李廷襲者語郡移置之結法與東方朔畫像相類而石獨完善少殘缺者覽之風稜秀出精彩注射勁節直氣隱隱筆畫間吁可重也天寶間安氏蹴天柱折而力扶之者郭尚父張睢陽平原與常山四

耳顏氏獨擅其二碑之所以重者是寧獨書哉

弁州山人

顏君廟碑銘乃真卿之父也其文曰君諱惟貞字叔
堅及叙其先世則曰魏有盛盛字叔臺青徐二州刺
史關內侯始自魯居于瑯琊臨沂孝悌里生廣陵太
守葛繹貞子諱欽字公若生汝陰太守護軍襲葛繹
子諱默字靜伯生晉侍中右光祿大夫西平靖侯諱
含字弘都隨元帝過江生侍中光祿勳西平定侯諱

髦字君道生州西曹騎都尉西平侯諱琳字文和生宣城太守御史中丞諱靖之字茂宗生巴陵太守度支校尉諱騰之字弘道生輔國江夏王參軍諱炳之字叔豹生齊侍書御史兼中丞諱見遠字見遠生梁鎮西記室參軍諱協字子和生北齊給事黃門侍郎待詔文林館平原太守隋東宮學士諱之推字介生皇泰王記室諱思魯字孔歸君之曾祖也率子弟奉迎義旗于長春宮拜儀同生勤禮字敬君之祖也

著作郎修國史夔府長史贈虢州刺史生昭甫

本名顯甫

敬仲殆庶無恤少連務滋辟彊昭甫字周卿君之父也高宗侍讀曹王屬贈華州刺史生我伯父諱元孫泉君君生闕疑允南喬卿真長幼輿真卿允臧自父以上並直書其名而加諱字其他伯叔羣從悉名之蓋古人臨文不諱今人自述先人行狀而使他人填諱非古也文有云子泉弘都之德行子泉即顏淵也

避唐高祖諱

金石文
字記

唐成德節度王武俊先廟碑

唐鄭贊撰崔公餘行書太子誦題額貞元十九年

京兆

金石錄

田弘正家廟碑

韓愈撰胡証八分書元和八年

金石錄

右田弘正家廟碑昌黎先生撰余家所藏書萬卷惟昌黎集是余為進士時所有最為舊物自天聖以來古學漸盛學者多讀韓文而患集文訛舛惟余家本

屢更校正時人共傳號為善本及後集錄古文得韓
文之刻石者如羅池神黃陵廟碑之類以校集本舛
繆猶多若田弘正碑則又尤甚蓋由諸本不同往往
妄加改易以碑校集印本與刻石多同當以為正乃
知文字之傳久而轉失其真者多矣則校讎之際決
於取捨不可不慎也即本云銜訓事嗣朝夕不怠往
時用他本改云銜訓嗣事今碑文云銜訓事嗣與印
本同知其為妄改也印本云以降命書用他本改為

降以命書今碑文云以降命書與印本同知為妄改也印本云奉我天明用他本改云奉我王明今碑云奉我天明與印本同知為妄改也此類甚多要知改

字當慎也

集古錄

唐文敝至韓愈始變而知所守後世學退之者惟歐陽永叔獨探其源余考田弘正碑蓋其傑然自出拔乎千百歲之上者永叔嘗得此碑以校集中誤字三處曰銜訓事嗣考其所出雜比成章錯綜而不亂信

其有得於此又曰降以命書奉我王明必以集為誤者余則不得信于此也以降命書不得如集所傳天明施於君為不類不若王明之切當而有据也今碑為非是則不可謂天明以降為工於集所著而傳則不可碑雖既定其詞而後著之石此不容誤謬然古人於文章磨練竄易或終其身而不已可以集傳盡為非耶觀其文當考其詞義當不然後擇其工於此者從之則不得欺矣今夫知文公者莫如文忠公文忠

謂是人不敢異其說況碑為當世所書人豈可盡告而使知耶今人得唐人遺藁與刻石異處甚衆又其集中有一作某又作某者皆其後竄改之也嗚呼知退之者益少今惟文忠為得其要其說猶然其下一

等又可知矣

廣川書跋

胡証字啓中河中河東人舉進士第渾瑊美其才奏寘幕下更從襄陽于頔署掌書記寶厯初厯拜

嶺南節度使

唐書

相國于頔先廟碑

唐禮部尚書同中書門下平章事權德輿撰兵部侍郎歸登八分書并篆額元和中頔位至司空平章事以品得立廟祠其高祖郛令以下為四室碑以元和

十一年立

集古錄目

相國崔羣先廟碑

唐武昌軍節度使牛僧孺撰起居郎劉寬夫隸書并篆額憲宗元和十四年羣方為中書侍郎平章事詔

立廟于京師崇業里追贈其父金部郎中積為左僕射及其祖懷州刺史朝魯曾祖壽州刺史湛為三室廟既成詔以羊豕助奠太常出博士佐禮至文宗太

和二年八月立此碑

集古錄目

劉寬夫伯芻子實歷中官終濠州刺史

唐書

唐令狐楚先廟碑

唐禮部郎中集賢院學士劉禹錫撰并書大和初楚為宣武節度使始立家廟于京師通濟里碑以大和

三年立

集古
錄目

唐薛平增修家廟碑

唐左散騎常侍集賢院學士馮宿撰給事中馮潯書

河中節度使增修其家廟以大和三年立此碑在夏

縣

集古
錄目

太和三和三年馮宿撰裴潯正書李寓篆額

金石
錄

李寓郇王禕九世孫成都少尹見唐宗室世系表

相國魏謩先廟碑

崔絢撰柳公權正書大中六年十一月

金石錄

唐贈司徒趙郡貞孝公李絳先廟碑

唐裴度撰韓欣正書并篆額大中九年立

京兆金石錄

北平郡王馬燧新廟碑

于邵書京兆府

金石略

于邵字相門京兆萬年人歷遷諫議大夫知制誥

進禮部侍郎朝有大典冊必出其手

唐書

唐襄州刺史薛係先廟碑

唐鄭虔晦撰柳公權正書咸通二年立

訪碑錄

唐碑

昭陵附葬諸臣碑

昭陵諸碑

冊府元龜貞觀十一年二月丁巳詔曰佐命功臣義
深舟楫或定謀帷幄或身推行陣同濟艱危克承鴻
業追念在昔何日忘之使逝者無知咸歸寂寞若營
魂有識還如疇曩居止相望不亦善乎漢氏使將相
陪陵又給以東園秘器篤終之義恩意深厚古人之

志豈異我哉自今以後功臣密戚德業尤著如有薨
亡宜賜塋地一所及祕器使其宅窆之時喪事無闕
所司依此營備稱朕意焉二十年八月丁亥詔曰周
室姬公陪於畢陌漢庭蕭相附彼高園寵賜墳塋聞
諸上代從窆陵邑信有舊章盖以懿戚宗親類本同
之枝幹元功上宰猶在身之股肱哀榮之義實隆始
終之契斯允今宜聿遵故實取譬拱辰庶在鳥耘之
地無虧魚水之道宜令所司於昭陵南左右廂封境

取地仍即標識疆域擬為葬所以賜功臣其有父祖陪陵子孫來欲葬者亦宜聽允

醴泉縣志曰昭陵諸碑若文皇后碑止存扁額長孫

無忌碑存而字盡滅其碑字尚有存者僅二十一片

房玄齡存五百餘字

褚遂良書

高士廉存三百餘字

許敬宗撰

趙模書

段志玄存八百餘字張後胤馬周蘭陵公主各

存六百餘字

公主碑李義府撰殷仲容八分書

姜遐許洛仁各存九

百餘字

姜碑姪邈公暉撰書

孔穎達存千字

于志寧撰

阿史那忠崔

敦禮各存七百餘字

崔碑于志寧撰于立政書

豆盧寬存四百字

李義府撰薛收張阿難監門將軍王君各百餘字徒存形

似唯唐儉存字千一百乙速孤行儼存字千四百

劉憲

撰白義旺八分書李靖存字千五百

許敬宗撰王知敬書

李勣存字千

八百

高宗御製御書

乙速孤昭祐存字二千五百餘

苗神客撰釋行

滿書又一碑存字百五十可辨而前有蘭陵公主

字中有詔詞曰第十九女則公主或有二碑不可知

此崇禎十一年苟好善所修志云又二十六年而

余至陵下時值雪後空山無人未及徧訪僅見李衛公一碑其下截俱剝去後又購得四五碑皆然且有并其碑而仆之者矣

趙岵曰萬厯戊午四月余為九巖之遊距昭陵十里宿高生儼家翼日同行北一里許得許洛仁碑又北半里許得薛叔碑似昭仁寺碑駸駸有伯施法折而西一里許為趙村村有廣濟寺寺後石鼓唐人書尊勝經呪精健絕倫止存十三從趙村北行里許為莊

河村未至先于道旁冢得姜遐斷碑至村則有段志
玄碑東行數十步有監門將軍王君碑橫于田間又
東行數十步一碑無字亦無冢蓋土人平之而并磨
其碑爾以圖考疑是長孫無忌碑又東行半里許為
劉洞村流水界之渡而東有房梁公玄齡碑褚河南
正書又東數十步有高士廉碑又東數百步有李靖
碑撰書姓名殘缺與諸碑同而上半完好靖冢作三
山形文皇以象其功土人謂上三冢李勣冢亦如靖

土人謂下三冢二冢南北相去不二里勣碑高宗御
書高二丈餘嶄然屹立與溫彥博碑搨者甚多土人
捶其字殆盡彥博碑在靖碑北數十步歐陽詢書書
法視皇甫九成化度三碑最為得中而不復可搨至
西峪村村東南古冢相連有褚亮碑阿史那忠碑張
後盾碑孔穎達碑豆盧寬碑張阿難碑麟次都不
百步書與段姜等碑皆有法而孔碑極類虞伯施但
結構小疎昔人謂為伯施書非也穎達卒在世南後當

是習世南者書之爾既而又得蘭陵公主碑于老軍營之西北得馬周碑于狗村之東得唐儉碑于小陽村之北又得崔敦禮碑又有尉遲敬德碑自額以下埋土中聞十五年前令芮質田掘而搨數十紙余出之了無一字又山半數冢土人謂宰相墳什一碑傳是魏鄭公碑其東山半數冢土人謂亂冢坪什二碑余皆起之則與尉遲碑同蓋土人捶而什且瘞之也又明日登山謁昭陵有六馬皆以片石刻其半左右

各三陵北四十五里比干村村東二冢一為乙速孤

昭祜碑苗神客撰釋行滿正書一為乙速孤行儼碑

劉憲撰白義暉八分書地僻捐者少故得稍完

已上俱金

石文
字記

右僕射溫彥博碑

唐中書侍郎岑文本撰弘文館學士歐陽詢書溫彥

公名彥博字大臨太原人太宗時官至尚書右僕射

封虞國公謚曰恭碑以貞觀十一年立

集古
錄目

右唐溫彥博碑歐陽公集古錄跋顏勤禮碑後云按唐書溫大雅字彥弘弟彥博字大臨弟大有字彥將兄弟義當一體而名大者字彥名彥者字大不應如此蓋唐世諸賢名字可疑者多封德彝云名倫房玄齡云名喬高士廉云名儉顏師古云名籀而皆以字行倫喬儉籀在唐無所諱不知何避而行字余按顏之推家訓云古者名終則諱之字乃可以為姓氏江南至今不諱字也河北士人全不避之名亦呼為字

字固為字尚書王元景兄弟皆號名人其父名雲字羅漢亦皆諱之其餘不足怪也又顏師古匡謬正俗載或問人有稱字而不稱名者何也師古考諸典故以稱名為是蓋當時風俗相尚如此初無義理也然師古既立論以稱名為是而乃以字行殆不可曉也

已金石錄

信本此碑字比皇甫九成差小而結法嚴整不在二碑下王元美曰如郭林宗標格清峻而虛和近人攷

溫公卒貞觀十一年是時信本年已八十餘而楷法
精妙如此虞伯施嘗謂信本齊紙筆豈亦齊老少耶
惜碑已殘后世不復見耳

石墨
鐫華

襄公段志玄碑

正書無書撰人姓名貞觀十六年

金石
錄

右唐段志玄碑以唐史考之多不合碑云諱某字志
玄而名已殘缺然史初不載其名碑云鄒平人而史
云臨淄碑云謚忠壯而史云忠肅舊史作忠壯與碑

合又碑云圖形戢武閣按唐史及諸書功臣圖形皆
云凌烟閣初余得河間元王碑圖形戢武意謂凌煙
先名戢武後改之耳今得斯碑亦同益知前言之不
謬二碑皆當時所立不應差誤也

金石錄

公封褒國公時亦授金州刺史見舊唐書而新唐書
亦削之何也且史云志玄父偃師至郢州刺史碑云
散騎常侍益都縣開國公贈洪州都督八州諸軍事
謚信公碑云志玄從破薛舉劉武周云而史不書

碑云謚忠壯舊史同而新史曰忠肅其刺謬不合如此惜碑全者僅半尚未得詳考耳至如碑書撰俱無名氏書法雖方整不無少遜崔安上李藥師碑然于正書中時作一二筆分隸是六代遺習

石墨
鐫華

唐國子祭酒孔穎達碑

于志寧撰正書無姓名貞觀二十三年

金石
錄

唐太子左庶子于志寧撰不著書人名氏穎達字冲遠冀州衡水人官至太子右庶子國子祭酒封曲阜

公謚曰憲碑以貞觀二十一年立

集古錄目

孔穎達碑于志寧撰其文磨滅然尚可讀今以其可見者質於唐書列傳所闕者不載穎達卒時年壽其與魏鄭公奉敕共修隋書亦不著又其字不同傳云字仲達碑云字冲遠碑字多殘缺惟其名字特完可以正傳之謬不疑以冲遠為仲達以此知文字轉易失其真者何可勝數幸而因余集錄所得以正其訛舛者亦不為少也乃知余家所藏非徒玩好而已其

益豈不博哉

六一
題跋

右唐孔穎達碑于志寧撰世傳虞永興書據碑云穎達卒于貞觀二十一年世南之亡久矣然驗其筆法

蓋當時之善書者規摹世南而為者也

金石錄

孔祭酒碑世傳虞永興書非也沖遠之沒乃後伯施十年豈非當時學永興法者書耶然筆勢適媚亦自

可珍

東觀
餘論

此碑于志寧撰不著書者名字其書全習虞永興而

結法稍疎自非中唐以後人所辦黃長睿亦云世傳
為永興書非也祭酒沒後永興十年乃學永興法者
書也碑半沒土中據集古錄已謂磨滅而摘其與史
傳不同者傳字仲達碑字冲遠碑與魏鄭公同修隋
書而傳不著傳又不著穎達卒時年壽今碑字冲遠
與修隋書事尚如新年壽字半泐隱隱可讀云貞觀
二十二年六月十八日薨春秋七十有五然則歐公所
有碑與今畧同數百年間豈無剝蝕之灾且昭陵諸

碑多不可讀而孔公碑獨尚如此或公有功于六經

而鬼神呵護之耶

石墨
鐫華

唐贈太尉房玄齡碑

碑缺不見書撰人姓氏考其字蓋褚遂良書也玄齡
字喬清河人唐初官至司空梁國公贈太尉謚曰文

昭碑以貞觀中立碑缺不見年月

集古
錄目

右唐房玄齡碑文字磨滅斷續不可考究惟其名字
僅存其後題修國史河南公而名姓殘闕者褚遂良

也按舊唐史云玄齡名喬字玄齡而新史乃云名玄齡字喬今碑所書與新史合惟宰相世系表又云玄齡名喬松者不知何據也

金石錄

碑已泐僅存六百餘字褚河南正書結法與聖教序同可寶也舊唐書諱喬字玄齡碑云諱玄齡字喬當是以字行後復以名為字耳新唐書從碑

石墨鐫華

申公高士廉瑩兆記

唐衛尉許敬宗撰趙模書高儉字士廉渤海蓆人官

至尚書右僕射申國公贈司徒謚文獻碑以貞觀二

十一年立

集古錄目

右高士廉瑩洮記唐史及元和姓纂皆云士廉父名
勵而北史作勸今此碑與北史合蓋唐史及姓纂轉
寫誤耳許敬宗撰趙模書模字畫甚工蓋貞觀中太

宗命臨蘭亭序者

金石錄

碑僅存三百餘字攷金石錄許敬宗撰趙模書碑稱
公諱儉字士廉則公亦以字行但房公名喬字玄齡

以字行而碑曰諱玄齡字喬歐陽公嘗以為疑云新
唐書房玄齡字喬以高公瑩兆記觀則喬果為字
此似未見房公碑者趙模在貞觀中以書名嘗與諸
葛貞臨蘭亭刻石者此書方整秀逸大類歐虞惜
不全見碑側題字數行亦半泐其一云會昌四年
五月四日六代孫尚書左丞元裕拜云云瑩所其一
云六代孫正議大夫行給事中上柱國渤海縣開國
男食邑三百戶賜紫金魚袋少逸云云謹附名題

于碑側會昌四年五月十五日按唐史稱元裕少逸
相代兄弟迭處禁中又曰會昌中少逸為給事中
然則此正兄弟相代時也而史不書少逸封爵且又
不言二人為士庶後唐世重氏族豈其譜逸耶二人
立朝亦非沒沒者非此幾令申公不得有其孫矣
光祿大夫豆盧寬碑

石鏤
鐫華

唐贈并州都督豆盧寬碑門下侍郎李義府撰正
書不著名氏寬字缺恕位至光祿大夫封茂國公贈并

州都督謚曰定碑以永徽中立在昭陵

集古錄目

李義府撰正書無姓名永徽元年六月

金石錄

寬欽望祖也高祖改其姓為盧氏永徽中復姓豆盧氏有子懷讓尚萬春公主又有子仁業即欽望父也史不為立傳但附見欽望傳中碑已殘泐僅數十字無從考其始末幸碑額亡恙知為寬碑正書精健有

法而無名氏撰者據金石錄為李義府

石墨鐫華

尚書張後盾碑

正書無書撰人姓名顯慶二年十二月

金石錄

唐李義甫撰正書無姓名顯慶三年三月立在昭陵

復齋碑錄

碑額題故禮部尚書碑已殘其可讀者有云故金紫

光祿大夫張肩有云二十三年除散騎常侍出陪鸞

輅有第四子巽第六子小師並早亡第五子律師泗

州司馬

云

攷唐書儒學傳有張後肩即其人而碑

云張肩豈字後肩耶舊史無字而新唐書曰字嗣

宗然則後字衍耶碑書撰俱無姓氏書法精健是得河

南之支流而開平原之門戶者

石墨
鐫華

汾陰公薛收碑

于志寧撰正書無姓名永徽六年八月

金石錄

唐于志寧撰撰書人不見名氏收位至天策府記室

太常卿定州刺史謚曰獻碑多漫滅志寧官爵收字

及鄉里葬之年月皆不可見

集古
錄目

右唐薛收碑文字殘缺其可讀處以唐史校之無甚

異同惟收之卒謚曰懿而史不書耳又收之子元超

據唐書及此碑皆云名元超而楊炯盈川集載炯所為元超行狀乃云名振字元超蓋唐初人多以字為

名耳

金石錄

此碑殘缺存者數十字耳碑額題太常卿汾陰獻公據史永徽間贈太常卿而不書謚見史之佚者多也碑書法亦類王知敬趙模而無名氏撰者據金石錄

為于志寧

石墨鐫華

唐贈司空魏鄭公碑

太宗御製并行書貞觀十七年正月

金石錄

唐太宗御製并行書徵字玄成鉅鹿曲陽人位至太子

太師贈司空謚曰文貞碑以貞觀十七年正月立

集古

錄目

唐太子少師崔敦禮碑

中書令崔安禮碑于志寧撰正書無姓名顯慶元年

十月

金石錄目

唐尚書左僕射于志寧撰太常少卿于立政書敦禮

博陵人位至太子少師侍中中書令固安縣公謚曰昭據唐書敦禮字安上而此碑云君諱安上字敦禮又曰本名元禮武德二年勅改為敦禮前後自相乖誤當以敦禮為正碑以顯慶元年十月立

集古錄目

右唐崔敦禮碑按新唐史列傳云敦禮字安上而宰相世系表則云名安上字敦禮今此碑所書與表合然舊史及碑皆言敦禮本名元禮高祖為改名焉其孫競墓誌亦云名敦禮蓋疑其以字行耳又世系表

其末載崔氏為宰相者二十餘人而獨不著敦禮乃

其闕漏也

金石錄

此碑久佚少傳于世余起而搨之有千餘字于志寧

撰丈名氏尚存據金石錄無書者姓氏而書法方整

圓健與王知敬書李衛公碑如出一手或當是知敬

書金石畧以為于立政書未知是否崔公先名元禮

高祖改敦禮字安上金石錄目曰崔安禮誤

石墨鐫華

唐贈司徒李靖碑

唐侍中許敬宗撰直弘文館王知敬書靖字藥師隴西成紀人官至右僕射衛國公贈司徒謚曰景武碑

以顯慶三年五月立

集古錄目

唐衛國公李靖碑顯慶三年許敬宗撰唐初承陳隋文章衰敝之時作者務以浮巧為工故多失其事實不若史傳為詳惟其官封頗備史云為撫慰使而碑云安撫使其義無異而後世命官多襲古號蓋靖時未嘗有撫慰使也由是言之不可不正又靖為刑部

尚書時以本官行太子左衛率其封衛國公也授濮
州刺史蓋太宗以功臣為世襲刺史後雖不行皆史

宜書其餘畧之可也故聊志之

集古錄

右唐李靖碑集古錄云靖之封衛國公也授濮州刺
史蓋太宗以功臣為世襲刺史後雖不行史宜書而
不書者闕也余按新史長孫無忌傳載無忌以下授
世襲刺史者凡十四人姓名具存蓋其事已見于他

傳則于本傳似不必重載也

金石錄

唐李衛公靖碑碑下半磨泐上半完好考金石錄為
許敬宗撰王知敬書知敬書在當時固自知名評者
謂與房玄齡殷仲容伯仲余觀此碑道美直是歐陽
率更虞永興之匹敵也歐陽永叔謂碑云為安撫使
史云為撫慰使碑靖為刑部尚書時行太子左衛率
封衛國公時授濮州刺史酹其爵邑子孫承嗣後雖
不行皆史宜書余考前二事誠如歐公但舊唐書傳有
改封衛國公授濮州刺史仍令代罷例竟不行等語

宋祁修新唐書削之但曰改衛國公耳歐公正與宋
公同事何得云宜書不書也且舊史云本名藥師碑
與新史皆作字藥師公又有弟名客師豈先名藥師
后改曰靖而以藥師為字耶

石墨
鐫華

唐贈司徒尉遲恭碑

唐中書舍人許敬宗撰不著書人名氏恭字敬德河
南洛陽人官至開府儀同三司鄂國公贈司徒并州

都督諡曰忠武碑以顯慶四年三月立

集古
錄目

正書無姓名許敬宗撰顯慶四年三月

金石錄

蘭陵長公主碑

李義府撰正書無姓名顯慶四年十月

金石錄

唐吏部尚書魚知中書門下事李義府撰慶州刺史

駙馬都尉竇懷哲書公主名淑字麗真太宗之第十

九女碑以顯慶四年十月立

集古錄

右唐蘭陵長公主碑李義府撰據唐書列傳公主太

宗第十二女而碑云第十九女蓋傳誤也

金石錄

蘭陵公主太宗第十九女名淑字麗貞駙馬都尉慶
州諸軍事使持節慶州刺史扶風竇懷愐太穆皇后
孫銀青光祿大夫上柱國竇德素子也史書竇氏二
十餘人無德素名而公主傳但言愐為太穆皇后族
子而已此碑亦可以備史之闕撰者據金石錄為李
義甫無書者名姓而方整勁拔亦歐虞之流亞也

石墨

鐫
華

唐右驍衛大將軍阿史那忠碑

集古錄作
薛忠碑

不著書撰人姓名忠字義節京兆萬年人唐上元中
位至右衛大將軍贈鎮軍大將軍謚曰貞碑以上元

二年十月立

集古
錄目

正書無書撰人姓名上元二年十二月

金石
錄

右唐阿史那忠碑唐書列傳云忠尚宗室女定襄縣
主始詔姓弥著史今此碑當時所立題云阿史那府
君之碑而元和姓纂亦云阿史那氏開元中改為史
疑傳誤也唐太宗親撥隋亂即位未幾遂致太平其

好賢樂善蓋出天性故一代豪傑皆樂為之用如忠之徒出於降虜亦皆立勲本朝著名後代雖云太宗天姿英睿絕人甚遠至於輸忠盡節衆賢之助亦多

矣嗚呼盛哉

金石錄

碑偶缺其姓游師雄作昭陵圖乃以為薛國忠而歐陽公亦以為薛國忠也今以碑傳參考碑云出光四禁入掌六師屬東戶之昌辰屢北軍之重任一居軒禁四十八年而傳云阿史那忠字義節蘓尼失之子

也以功擢左屯衛將軍尚宗室女定襄縣主始詔姓

缺

封薛國公

寶刻
叢編

碑泐其存者稍倍于豆盧寬碑亦以額識之而書法

更勁拔在永興河南間惜撰書者俱無名氏可攷耳

石墨
鐫華

唐中書令馬周碑

殷仲容八分書許敬宗撰上元元年十二月

金石錄

此碑在大道傍周墓前殘缺為甚存者僅四百餘字

非篆額字存幾不知為馬周碑今摩碑者多不摩額
是一恨也據金石錄許敬宗撰殷仲容書仲容名書
此碑分隸有法雖存者少亦足以觀矣

石墨
鉛華

唐贈太常卿褚亮碑

八分書無書撰人姓名高宗時立年月殘缺

書撰人名氏皆缺文為隸書亮字希明河南陽翟人

仕至散騎常侍弘文館學士贈太常卿謚曰康碑以

貞觀中立

集古
錄目

右唐褚亮碑唐書云亮杭州錢塘人而碑云晉南遷家于丹陽按元和姓纂自有錢唐褚氏與亮族系不

同唐史蓋失之

金石錄

亮遂良父也由陳入隋由隋入唐八十八卒碑已殘闕不可詳考分隸與馬周碑如出一手疑亦殷仲容書遂良能書非仲容輩恐不得污其父碑也

石墨鐫華

唐英公李勣碑

高宗撰并行書儀鳳二年十月

金石錄

右唐李勣碑按唐史太宗屬疾出勣為疊州都督高宗立召授檢校洛州刺史今以碑考之其除洛州乃在太宗朝高宗即位授開府儀同三司耳又新舊史皆云勣年八十六而碑云年七十六碑高宗自撰其所書官爵年壽皆可信不疑也

金石錄

公陪葬昭陵碑文高宗製并書行草神逸機流後半尤縱橫自如良由文皇歲右軍墨蹟如蘭亭之類極夥故其父子青宮萬機之暇一意模倣以至此也碑

首御製御書四字大類褚登善余曾至碑下見碑高大過房杜諸臣豈以陛下家事之一言而為是以報

之耶

石墨
鐫華

唐荅公唐儉碑

行書無書撰人姓名開元二十九年二月

此碑在昭陵東南最遠而地僻故傳者極少余至其下摹一紙真行書輕圓秀勁卓然名家惜無姓字攷舊史官為立碑碑雖殘缺後有夫人河南元氏又有

皇唐開元廿年等字或開元時始建碑耶似不可

曉

石墨
鐫華

唐姜遐斷碑

遐者謬之孫行本之子史但附兄簡傳云弟柔遠美
姿容善敷奏則天時至左鷹揚衛將軍通事舍人內
供奉寥寥數語亦不云名遐遐之子即姜皎而撰書
遐碑者乃簡之子晞代簡襲行本爵為郾國公者也
書金法登善而結小弱碑上段已亡止有下一段棄

墓側余摹而錄之按游景叔刻昭陵圖止有姜確墓
確行本名史亦云行本陪葬昭陵而俱不及柔遠

也

石墨
鐫華

姜晞秦州上邽人謚孫嗣邨國公開元初左散騎
常侍見舊唐書

唐許洛仁碑

洛仁附見許世緒傳末數語碑載甚詳但半泐不可
讀正書極似隋賀若誼碑方整有之而勁拔則當遠

遜顏平原

石墨
鐫華

唐左監門將軍王君碑

碑書勁健可錄額題左監門將軍王君而多泐其存者有云武德九年授內侍有云貞觀四年遷右監門將軍進爵為公有云尋加正議大夫內侍如故有云吐谷渾據龍沙有云又出使吐蕃有云二十二年遷使持節云云其人蓋宦官而曾與李衛公同征吐谷渾者也碑缺其名而史亦不書當是唐初尚無觀

軍容使之權耳

石墨
鵞華

唐將軍張阿難碑

碑書大似李衛公碑殘泐特甚中有云內侍汶江縣
開國侯張阿難又有云銀青光祿大夫內侍汶江縣
開國侯張又有云勇冠三軍掃定河汾等語其人蓋
宦官而云勇冠三軍得無溢美乎唐初開國宦寺為
公侯魚李之禍兆矣

石墨
鵞華

唐乙速孤昭祐碑

苗仲容撰釋行滿書載初元年

金石錄

乙速孤神慶碑弘文館學士苗仲容撰神慶唐初仕
三衛高宗時為太子右虞候副率以卒乙速孤氏在
唐無顯人惟以其姓見於當時者神慶一人而已元
和姓纂但云代人隨魏南徙而已其叙神慶世次又
多闕繆而此碑所載頗詳云其先王氏太原人有闕文
代祖顯為後魏驃騎大將軍賜姓乙速孤氏遂為京
兆醴泉人曾祖貴隋和州刺史和仁郡公祖安隋益

州都督父晟唐驃騎將軍乙速孤氏世無可稱而其
姓出代北莫究其詳惟見於此碑者可以補姓纂之畧
以備考求故特錄之

集古錄

昭祐名仁慶本姓王氏太原人五代祖顯魏驃騎大
將軍賜姓乙速孤遂為京兆醴泉人曾祖貴隋和州
刺史和仁郡公祖安益州都督父晟唐驃騎將軍代
有顯人神慶高宗時為太子右虞候副率檢校左領
軍將軍上柱國以卒史不立傳且不復姓王氏不可曉

碑苗神客撰釋行滿書書亦勁健有法然不及王知

敬趙模諸人

石墨
鐫華

唐乙速孤行儼碑

劉憲撰白義旻八分書開元十三年二月

金石
錄

行儼字行儼神慶子也墓相去不十餘步二碑並峙

余皆摩之而因以知神慶尚有子行儼仕為右武衛

將軍也碑為劉憲撰白義旻分書書亦跳拔宜居韓

蔡之亞攷歐陽公有神慶碑而未見行儼碑且前碑

五代祖五字甚明而公以為闕文或所見偶闕本耳

石墨

鐫華

右昭陵諸碑金石文字記載虞公溫彥博襄公段志
玄國子祭酒孔穎達梁公房玄齡芮公豆盧寬尚書
張後胤衛公李靖蘭陵長公主許洛仁薛公那阿史
那忠英公李勣中書令馬周申公高士廉散騎常侍
褚亮右武衛大將軍乙速孤行儼等十五碑潘耒補
遺又增崔敦禮姜遐張阿難汾陰公薛收等四碑

潘耒曰昭陵陪葬者百六十五人今存者僅十九碑
記中載其十五惟遺此碑先師所錄必目覩其碑與
收得拓本者非然則置之蓋其慎也

六藝之一錄卷六十六